

Korosi

Pas nda Por ai Korosihündambo sürü papımarandi

1 ¹Ro Por Sisas Kraisindi hoafi sahamindi ha-rihandeimb-anahi. God ai ahandi hohoanimonambo wambo Kraisindi hoafi semindi hombohünda kafaore hiningi-mareandiri. ²Wandi wandafi, Timoti diboanehi pas nda sürü papiriho Godindi nendi Sisasimbo anihondumbo-rihoreimbi Korosi ngoafihü amarei siheimbo koararihehoandi. Sihefi Ape God ai siheimbo moani hipoambo-ndearühi ngusüfoambe afurife kifimbi hohoanimo mbisagadür-amboane.

God ai Korosi nendambo anihondümbofe hohoanimo botimareandüri

³Yihoehi didibafife hoafi ranambe siheimbohünda muṅguambo si Godimbo sihefi Adükari Sisas Kraisindi afindi ranahambo hihifirihorihü hoafiyahoando rihoandüh-anehi. ⁴Se Sisasimbo anihondumbo-rihorühi asu Godindi nendi amuri animboei aheimbo ngusüfo parihi marihüdi hoafi ra ro himborimayehi ranimboyehe ro Godimbo hihifimarihori. ⁵Nimboe sapa se anihondü hoafi asu aboedi hoafi ranai tüküfeyoani aboedi moatükuni God ai sünambe masihendi ranahambo himboriyei hehi semindimbohünda anihondümborihü nimoamo himboyei arihüdi. Asu ranana sihei hipoambofe asu ngusüfo pefe hohoanimo ranahandi nimindihane. ⁶Muṅguambo hifihü ai bokamarihoemo raniyo nimorehi nindowenihi afindi anihondumbo-rihindühi süngumarihindi asu raniyo ahei hohoanimo ra aboedi tüküme Feyo siheimbo rawareandi nou. Aboedi hoafi ra weṅgurühi siheimbo sowahi tüküme Feyo himboriyei asu ranimbo Godindi moani hipoambofe hohoanimo ra anihondumbo fifirimarihindi. ⁷Epafras ai Godindi-mayo moani hipoambofe hohoanimo hoafi ra yamundi-mareandüri ra se fifirihimboane. Nindou ranai ro-dibo Sisasindi ratüpuriyefi-rihundeimb-ani asu ai yihoehimbo farihemuni arandi ahambo ngusüfo pamarihori. ⁸Yifiafi Aboedi ranai siheimbo

nindou ŋgorümbo ŋgusüfo pefe hohoanimo masagadüri ra Epafras ai yihoehimbo wataporimbo-marandi.

**God ai Korosimbo ŋginimbi-ramündüri
yahuhaya Por ai didibafimefindo**

⁹Ranimbo-hündamboyehe ro siheimbo himboriye hohoa muŋguambo si ra siheimbohünda Godimbo didibafiye arihoandi. Raniyehi ro Godimboya ai Yifafi Aboedindi-mayo aboedi fifirife dagadürani asu se nini-moatükuni ai yifirayu ra fifiri-mbirihinda se hohoa didibafiyahoando arihoandi. ¹⁰Ranimbo-hündambo-animbo asu se Adükarindi nendi nahurai hahabodeihü asu nini hohoanimo se rawarihindi ra hihifi-hihifindümbui. Ranimbo asu se nimboeimbo ahandi-mayo aboedi ratüpuri rani yangiri süngundihi ndühündi asu sihei Godimbo fifirife ra ŋgombo adükarindimboe. ¹¹Ro rariho didibafiyahoandühi sehiya: God ai siheimbo ahandi hepünüfeimbi ŋginindinambo ŋgusüfoambe ŋginamindüri-mboane. Ranimboane asu ŋginindi nimboeimbo muŋguambo tiŋirifo ranahambo moanane mbiseihü hihifi-hihifindeihü Godimbo hihifindihori asehi. ¹²Ai siheimbo ramareandüra se aboedi hohoanimo süngurihi arihündi ranimboane asu aboedi moatükuni semindimbo diboniyu masihendüri raninambo süngunambo ndahümündimboeye. Ranimbo Godindi nendi muŋguambo si God hifandirandi raniŋihü animboei rani-babidi rani-moatükuni ra se ndahümündimboeye. Ranahambo se Godimbo hihifindihori. ¹³God aiyu sihefimbo nimbi nimariwanipoedi hüramündümuni tüküfi aboedambo ahandi nimori mami ranahandi ŋginindi hifandirand-ambe hiniŋgi-mareamuni. ¹⁴Ahandi sünguyefi sihiri aboedambo tüküyahundühi sihefi moaruwai hohoanimo ranahambo amboawiyei mehumuni.

Sisas asu ahandi ratüpuri hohoanimo

¹⁵Godindi nimori Krais-ana sapo God hoefekoate-ayefi yahurai sisami hamind-ani. Aiana weaŋgurühi hondü tüküfi haya asu muŋguambo moatükuni God ai nafimarandi ra ai ŋgasündife nimindihani. ¹⁶Ahandi sünguyo God ai muŋgu moatükuni nimoamo sünambe asu hifini ra nafimarandi. Ai hoefeimbi asu hoefekoateimbi moatükuni ŋginindi muŋguambo nafimarandi. Raniyu muŋgu moatükuni ra ahandi süngu ahambohünda nafimarandi. ¹⁷Raniyu Sisas Krais ai boatei muŋgu moatükuni tüküfekoate-yoambe manüŋgu asu rani-moatükuni ranai ahandi ŋginindinambo aboedi tüküfe engoro. ¹⁸Ranimboane asu ai ahandi nendi-yafe fi ranahambo mbiroyuhü asu fi ranahambo yangiri niŋgombo nimindihayu. Ai boatei weaŋgurühi tükümeŋiyu asu muŋgu moatükuni ranahambo bogori niŋgomböhünda ai boatei yifihündi botimeŋiyu. ¹⁹God ai ahandi muŋguambo yangiri niŋgombo hohoanimo

asu ŋginindi ra ahandi Nimorindi fiambe mbimarowamboane mehu. ²⁰Muŋgu moatükuni hifi ndanihünda asu sünambeahindi ra Godimbo hürütimb-anei, ŋga ahandi nimorindi sünguyu ai muŋgua moatükuni ra ai randeambui asu God-babidi wudindeimboyei. Ranimboyo Sisasindi hori ranai nimi keimbi karihendeimbi fih kamefoenda asu God ai sihefi hürütimbü hohoanimo ra hifinambo-mareandi.

²¹Horombo ana God ai aŋguni manüŋgu asu se aŋguni manimboei. Raniyei asu se ahambo hohoanimoambe hürütümarihori. Sapo se moaruwai hohoanimo ra süngurihindühi wambo. ²²Ŋga asu Sisas ai nimi keimbi karihe-ndeimbifih yifiyuhü rani-süŋgunamboyu God ai-dibo ŋngombo mamambe-mareandüri. Siheimboya, ai wambo sowana sühüsihumbo asu ai aboedi sürühehindeimbi nimboeimbo moaruwai hohoanimo ra nimarikoate-mbeyondüri yahuhayamboyu ramareandi. ²³Se anihondümbofe hohoanimo raninambo kikihisafi-rihümündih moani ŋginindi animboei ana, rani-moatükuni siheimbo tükündifemboe. Ŋga moaruwai ratüpuri hohoanimo ranai siheimbo hühündeirani asu se aboedi hoafi himboriyei hehi anihondümbomarihindi ra hiniŋgi-ndihimboyei. Ro Por aboedi hoafi ranahandi ratüpuriya-rihandeimb-anahi asu hifi ndanihü nindou muŋguambo ranaheimbo rani hoafi ra hoafiya marihandi.

Por ai Korosimbo mafarihendüri

²⁴Haponda ro siheimbo farihefendürühi nine tiŋirifo ra wandi finambofe semindimbo hihifi-hihifeheandi. Roana Kraisindi nendi ahandi fi nouayo ranimbo fehefembo samboanahi. Kraisindi asübusi ahandi nendi ranaheimbo farihefembo ra awi mbeŋgori. Asübusi ra ro semindimboayahi nda Sisasindi asübusi rani-dibo simoŋgorindihea samboanahi. ²⁵God ai ahandihoari kamafoareandir-amboyahi ro Kraisindi nendi-yafe ratüpuriyo-rambo siheimbo farihefe-ndürimbohünda tükümeheandi. Ranimbo-hündambo-animbo asu ro Godindi hoafi eŋgoro ra muŋgu wataporimbo-ndihamboyahi. ²⁶Muŋguambo si maho ra horombo ana hoafi ra muŋguambo nindou ranahei himboahü dibo meŋgoro. Ŋga hapondani ana Godindi nendi ranahei himboahü weindahi hamindi tüküfemboane. ²⁷God ai hoafi dibo eŋgoro ra Suda-yafe ndifo ranaheimbo nafuimbo yahumboani. Hoafi dibo hamindi meŋgoro, ŋga God ai weindahimareandi ra ndahurai-ane: Sisas ai se-babidi manüŋgu-wamboanei asu se ahambo hifandarihori. Nimboe ai siheimbo semindindüri hafo ai-babidi aboedi napo ahandi-mayo sünambe eŋgoro ra semindimbohünda.

²⁸Roana Sisasindi aboedi hoafi ra muŋguambo nindou mamami ranaheimbo hoafiyefi-rihundeimb-ane. Rananeŋ ro nindou muŋguambo ranaheimbo wudipoaporihu yamundirihurühi ahini hoafiyefi arihundi.

Asu ro aboedi hamindi fifirifenambo yamundihundüri arihundi sapo ai ŋginindi hamindi süŋgurihindeimbi tükündahindani asu ro Godimbo sowana semindindüri hombohünda. ²⁹Ranimbo-hündamboane asu ro Adükarindi ŋginindinambo tiŋamboyahühi ratüpurayahi. Krais aiyu rani ŋginindi ra wandi fiambe hiniŋgi-mareandiri.

**Ai ŋginindi anihondümbo-ndihindühi tikai
hoafi yihiri-mbirihind-amboane**

2 ¹Ro siheimbo yarihi fifirimbirihinda samboanahi afindi hamindi tiŋirifoayahi se-anei adükari ŋgoafi Raodisiahünd-anei asu Godindi nendi wandi ŋgusümboari hoiefekoate-maye-anei fehefembohünda. ²Ahei hohoanimo ra ŋginindi tükündifehümbo ŋgusüfo pefirindeihi aboedi hohoanimo sahümündihümbo asu rani hohoanimo ranai ahei anihondümbofe hohoanimo ranahambo ŋginimbi-ramindindüra samboanahi. Asu Godindi dibo hoafi horombo meŋgoro ranamboani ai fifirimbirihinda samboanahi. Ŋga Krais-ani ai ahandihoari hoafi ranahambo nimindihayu. ³Godindi muŋguambo fifirife asu hohoanimo ra Krais ahandi hohoanimoambe tüküfemboane ŋginindi napo arambe tükefeyo nou. ⁴Nindou ŋgorü ai siheimbo sisindi hoafinambo tikai hoafinda-hündürimboyei saheheamboanahi hoafi nda siheimbo hoafayahi. ⁵Ro se-babidimbo nimboambo-yahipoani, ŋga wandi hohoanimo ana se-babidimboane eŋgoro. Rananahi ro se Kraisimbo anihondümbo-rihorühi aboedi ŋginindi nimboeimbo ratüpurayei ranahambo fifirihe hehea hihifi-hihifayahi.

**Sihiri Krais-babidi niboadefüh-animbo yanggiri
niŋgo hondü ra ndahumindeli-mboane**

⁶Ŋga asu se Sisas Kraisimbo yihoeŋi Adükar-ani seihü masahorimindei ranimboane asu se ai-babidi nimboei ŋgei. ⁷Ranimbo se ahandi ŋginindinambo nimboei sapo nimi ahari hifambe hanihü ŋginindi aniŋgo-ane asu wori kambohoani ŋginindiwami ŋginindi afondaro nahurai nimboei. Ro siheimbo aboedi hoafi yamundarihundüri rani yanggiri anihondümbo-ndihindühi ŋginindi nimboeimbo asu se Godimbo hihifindihori ndühündi. ⁸Asu se randihindühi hibadihümbo. Ŋga nindou ŋgorü ai siheimbo hoafi nimindi fifirifekoate hoafinambo tikai hoafindandürümbui. Yahurai nindou-ana ahamundi amoaoyomondi-mayo asu moaruwai nendi hifandi-rundeimbi-yomondi-mayo hohoanimo masemündu, ŋga ai moai Adükarindi hohoanimo süŋgureandi. Ŋga wani.

⁹Muŋguambo yanggiri niŋgombo hohoanimo Godindi-mayo ranana Kraisindi fiambe tüküfemboane. ¹⁰Krais ai muŋgu-moatükuni ŋginindeimbi ranahei mbiro-ani. Se Kraisind-anei, ranimboyu God ai siheimbo yanggiri niŋgo hohoanimo masagadüra sihei fiambe

tüküfemboane. ¹¹Se Krais-dibo animboadei ranimbo-hündamboyo se fi-hoeari kefetirihefe hohoanimo hondü sünguarihindi. Rani-moatükuni ranana fi-hoearindi-yopoani, nga wani. Nga rani-moatükuni ranana Kraisindi sünguyo sihefi yaboateihüdi ngusüfoambe hohoanimo ra raguanambo-femböhünda ramarihindi fi-hoeari kefe tirihefe nou. Rani-moatükuni ranana Kraisindi-mayo fi-hoeari kefe tirihefe hohoanimo hond-ane. ¹²Se hundürayei ana, se Krais-babidi hifambe masamboerei nahurai-ane, asu se ai-babidi botimehindi. Se Godindi nginindi Sisasimbo botimariri ranahambo anihondümbö-marihinda ranimbo God ai siheimbo botimareandüri.

¹³Horombo ana se moaruwai hohoanimo süngumarühi hei. Raniyei asu se yaboateihüdi hohoanimo ra moai raguanambo-rihindi, nga asu ranai siheimbo hifokoa-mareandüri noumehindi. Nga asu siheimbo God ai ahandi hipoambona Kraisindifihi yangiri ningombo hohoanimo ranambo botireandüri pamareandüri. Raniyu asu ai rani-simboani sihei moaruwai hohoanimo mamarondüri ra raguanambo-mareandüri.

¹⁴Raniyo münguambo ahinümbi hohoanimo ranai sihefimbo papi-hoafireamuni mbura sihefi moaruwai hohoanimo ra weindahi-mareandi. Nüne hohoanimo moaruwai ratüpuriyefi marihundi ranana papi-hoafi sürü pefe sihefewa engoro, nga asu God ai rani-moatükuni ra nimi keimbi karihe-ndeimbifihi pare tikoramündühi müngu moendimareandi.

¹⁵Raniyu God ai moaruwai nendi, asu nginindi bogorimboyafu-ndeimbi hifinambo-mareapuri. Nimi keimbi karihendeimbifihi God ai münguambo nindou-yafe himboahü nafuimayu Krais ai ahamumbo ngasüdi-mareapura asu ai nginindikoate-memo.

Sihiri Krais-babidi yifimayefi

¹⁶Ranimbo-hündamboane nindou ngorü ai ngiri siheimbo papi-hoafindandüri sesi sesi, hoe simindi, adükari rotumbo si asu simbori amoamofihü rotumbo asu moani ngoafimbo nimarimbo si ahinümbi ranimbo. ¹⁷Horombo ahinümbi hohoanimo ranana nini-moatükuniyo süngunambo tüküfemboayo ranahambo sisami nahurai-ane, nga haponda Krais-ani ai anihondü hamindi hondayu. ¹⁸Se hibadihümbö nindou mami ai siheimbo papi-hoafindandürani animbo se ngiri Godindi takini ndahümüdi. Ai tikarehaya ahei ndüri hifinambo-mareandi, nga asu sünambeahindi nendi ranaheimbo adükar-anei sei hehi ahei ngusüfo ranaheimbo parihi arihüdi rani hohoanimo ranahambo hihifi-hihifiyei arihüdi. Nindou ranai nini-moatükuni yafogoadinambo nahurai hoeirihi hehi ranahambo afindi wataporimbo-arihüdi ahei-hoari ndüreimb-anehi asei. Nga ai nindou-yafe hohoanimo yangiri süngurihindühi fifirihundeimb-anehi asei. ¹⁹Rananei asu nindou ranai Krais mböro hondü ranahambo moai ndorihü kikihirihomindei. Kraisindi nendi ai ahandi

fi-ane asu Kraisi ai mandühari fisafi ranai türe-türe ra haya fi afindi tükefeyo God ai ramareandambo wambo.

²⁰⁻²¹ Seana Kraisi-babidi yifiyei mburihü asu rani-simboani hifi ndanihünda hohoanimo moaruwai ra ndeara hiniñgi-marihind-ane. Iña asu nimboeyei haponda se nindou hifi ndanihündambo hahabudi arihünda nahurai tükehinda? Asu nimboeyei se muñguambo hifinindi hohoanimo ndahurai meñgoro rani-hoarehi animboei ra sapo yare hoafiyowohüya, 'Rani-moatükuni ra refepoani, rani-moatükuni ra sesipoani, rani moatükuni ra sündifepoani,' yaho arandi. ²² Se muñgu moatükuni ra randihinda moendindimboe. Nindou aiyomo rani hohoanimo ra moani ahamundi hohoanimonambo yangiri hohoanimoyomo houmbo sihefimbo yamundimarümuni. ²³ Anihond-ane, rani hohoanimo raniramuni sihefimbo iñginindi hohoanimo botireamunani asu sihiri sünambeahindi nendambo didibafi-yahundühi sihefi hohoanimo ranahambo hifinambo-reamunühi asu sihefi fi ranahambo asübusi semuni marandi. Ranimboyo asu sihefi himboahü ana rani-moatükuni ra ai aboedi mbumundi hamindi himbomayo. Iña asu rani-moatükuni ranana moaruwai hohoanimo sihefi iñgusüfoambe botife ranahambo iñgiri hifinambo-ndeandi, iña wani.

God ai Kraisi-babidi botimareamuni

3 ¹ God ai Kraisi-babidi sihefimbo botireamunimboani. Ranimbo-hündambo-animbo asu nini-moatükuni hohoanimo nimoamo sünambe eñgoro ranahambo yangiri hohoanimondei. Nimoamo ranihü ana Kraisi ai muñguambo moatükuni ranahambo bogorimbofi Godindi wari hondüni nimarümboani. ² Muñguambo si aho ra se sünambeahindi moatükunimbo yangir-animbo hohoanimo pandihindi, iña hifinindi moatükuni raniyopoani. ³ Seana Kraisi-babidi yifimayei, ranimbo-wambo asu sihei koadürü yangiri iñgombo hohoanimo ranai-ana dibo mbengori Kraisi-dibo Godindi fikimi, iña awi moai weindahi yangoro. ⁴ Kraisi-ana sihei yangiri iñgombo hohoanimo ranahambo nimindihani. Süngunambo ai weindahi tüküfiyu-ambe-animbo asu se ai-babidi Godindi iñginindi himboamupuimbo-randeimbi eñgoro ra ndahümündi hehimbo ranihü weindahi tükündahimboyei.

Se simbori hohoanimo sahümündi-mboanei

⁵ Ranimboane se sihei hohoanimoambe hifi ndanihündambo hohoanimo amarondüri ra raguanambo-ndihindi. Ro hoafehandüri moaruwai hohoanimo nda ndahurai-ane: Nimorehi sisihimo hohoanimo, nindowenihü birabiri hohoanimo, iñgusüfo botireandeimbi moaruwai hohoanimo asu nindou iñgoründi napo hohoanife hohoanimo. Hohoanife hohoanimo ranana tikai godimbo süngufe hohoanimoane. ⁶ Nindou

düdi ai Godindi hoafi himborikoate rani-moatükuni hohoanimo sünguarandi ana, asu God ai nindou ranahambo nginindindürühi moaruwaimbo-ndirümbui. ⁷Horombo se-amboani nindou rani-babidi nimboeimbo muᅅguambo moaruwai hohoanimo ra süngumarihündane. ⁸ᅅga haponda se hohoanimo nda muᅅguambo hiniᅅgindihindi: ᅅginindi hohoanimo, watikoafi hohoanimo, nindou ᅅgorumbo moaruwaimbofe hohoanimo, amoᅅgoni hoafi, muᅅguambo moaruwai hoafi ranana se muᅅgu hiniᅅgindihindi. ⁹Se mamami simbori tikai hoafüri-ndeimboyei sapo ndeara yaboateihündi moaruwai hohoanimo ra sihei ᅅgusüfoambe-ahindi hiniᅅgi-rihimboanei. ¹⁰ᅅga asu hapondana se simbori nindou tüküyahimboanei. God aiyu ahandihoari nindou simbori ra nafimarandi. Raniyu asu ai siheimbo hohoanimo simbori simborireandüri hiniᅅgireandüri arandi se God muᅅguambo moatükuni nafira-randeimbi ranahambo diboadofe fifirifimbohünda. ¹¹Ranimboane asu Godindi simbori hohoanimo süngu sihiri ahandi himboahü mamanehi. Suda asu Suda-yafe ndifo rani-poanimboyopani, nindou fi-hoeari kefe tirihefeimbi asu nindou fi-hoeari kefe tirihefe-koateimbi rani-poanimboyopani. Ndifo asu nimambeahindi buriyeimbi nindou, kaki semindikoate ratüpuriyomo-rundeimbi nindou asu nindou moani aboedi niᅅgomondeimbi ra rani-poanimboyopani. ᅅga Kraisi ai yangiri adükari moatükun-ani asu muᅅguambo sihefi flambe amarumuni.

¹²God ai siheimbo wand-anei yahu hiniᅅgima-reandür-amboani, asu se ahandi nindoumboyahi manimboei-amboanei asu ai siheimbo muᅅguambo si ᅅgusüfo pareandüri arandi. Ranimboane asu se hohoanimo ndahurai ndahümündi: Hipoambofe hohoanimo, nindou didiboadife hohoanimo, afurife hohoanimo, wari hoafeandühife hohoanimo, simbori hoafikoate hohoanimo. Rani-hohoanimo ra se süngundühi ndühündi. ¹³Nindou ᅅgorü ai siheimbo moaruwaimbo-areandüri ana, asu se amboawi mbisei. Nindou ᅅgorü ai ᅅgorumbo moaruwaimboariri ana, nindou ranai ᅅgiri ahambo simbori hoafindu. Sisas Kraisi ai sihei hohoanimo moaruwai ranahambo amboawi mehu nahurai-animbo asu se-amboani rani-süngumbo nindou ranaheimbo amboawi mbisei. ¹⁴Amuri hohoanimo muᅅgu ra ranahambo kapeihi ᅅgusüfo pefirindei. Ranane ᅅgusüfo pefe hohoanimo ra muᅅguambo mamambere hiniᅅgireanda ᅅginindi aniᅅgo.

¹⁵Sisas Kraisindi-mayo ᅅgusüfoambe afurifimbi hohoanimo masemuni ranai sihei ᅅgusüfo ranahambo ndore hiᅅfandimbiandür-amboane. Se fi mami nahurai-anei asu God ai siheimbo afurife küfimbi hohoanimondei yahuhaya mborai mehündüri. Asu se Godimbo hihiᅅfindiᅅhori ndühündi. ¹⁶Kraisindi hoafi ra sihei hohoanimoambe ᅅginindi mbimarindür-amboane. Se siheihoari ndondihi fifirindiᅅhündühi simbori yamundifirindei. Se Herü Bukambeahindi herü, Sisasimbo

kakisaombo herü asu Yifiafi Aboedindi-mayo herü ra heründeihä sihei hohoanimoambe Godimbo hihifindihori. ¹⁷Rananimbo asu se munngu moatükuni hoafi hoafayei-ane asu nine ratüpuri ratüpurayei-ane ra Sisas Adükari yifirayu süngu ratüpurindei. Krais ai siheimbo mafarihendüri ranimbo-hündambo se Ape Godimbo hihifindihori.

Nimorehi nindowenihi asu ahei nimori ranaheimbo hoafi

¹⁸Nimorehi se, sihei nindowenihi ranahamundi hoarehi nimboei. Rani hohoanimo ranane Godindi himboahü aboedi hamindayo. ¹⁹Nindowenihi se-amboani, nimorehi sihamundi ranaheimbo ngusüfo pandundürühi sisi-koate ndowandümondüri ningomo. ²⁰Nimori se-amboani munngua moatükuni sihei boagiri ai hoafayei ahei hoarehi niboadei. God ai rani hohoanimo ranahamboani hihifi-hihifayu. ²¹Asu afindi se-amboani sihamundi nimori ranaheimbo randüwurani asu ai nginindi-nginindindeihä digori-digorindahimboei.

Ratüpuriyeyi-rihündeimbi asu hifandu-rundeimbi-yafe hoafi

²²Ratüpuriyeyi-rihündeimbi se sihei hifandüdüri-rundeimbi ahamundi hoafi rani-yangiri süngundihindi. Se ahamundi himboahü yangiri ai hoerundühi aboed-anei mbisimonda mbisei hehi ratüpuri aboedi ratüpuri-ndeimboei. Nga se Adükarimbo yihimbondeih-animbo asu sihei hohoanimo ra ratüpuri aboedi ranahambo yangiri hohoanimo pandihindi. ²³Se nine ratüpuri ratüpurayei ra ndondihi ratüpurindei. Sapo se munngu ratüpuri ratüpurayei ra Adükarimbohünda ratüpurayei, nga nindoweyiopoani. ²⁴Se fifirihimboanei, süngunambo ana Adükari ai siheimbo takini dagadürimbui. Ai nini-moatükuniyo siheimbo segudürimboayu ra napire sihaiamboani. Se Kraisindi ratüpuriyeyi-rambohünda nimboei. Aiana sihei Adükar-ani. ²⁵Nindow ai moaruwai hohoanimoayei ana, asu God ai aheimbo simbori moaruwaimbondearümbui. Nga God ai nimorehi nindowenihi-yafe hohoanimo ra mami simogodühi yibobore randühani.

4 ¹Ratüpuri hifandüdeimbi bogori se-amboani sihamundi ratüpuriyeyi-rihündeimbi nindow ranaheimbo aboedi ndondüdüri hibadüdüri. Se fifirumboanemo, Bogori sihamundi ranai-amboani sünambe mbamarü.

²Godimbo didibafifendombo hohoanimo ra se ndondihi kikihindihümündi. Se didibafifembo ra ndondihi hohoanimondeihä Godimbo hihifindihori. ³Se yihoefimbo kameihä Godimbo didibafindahindowani asu ai yihoefimbo nafi nafuinduanani ro Kraisindi hoafi weindahä bokarindi-hehumboane. Hoafi ranahandamboyo wambo karabusambe hiningima-rihindiri. ⁴Se didibafi-ndahindan-animbo asu ro Sisasindi-mayo hoafi ra ndondihe türiboadihe hoafindahani weindahä

tükümbifeyo-wamboane God ai ranahambo hohoanimoayu süngu. ⁵Se nindou Godimbo süngufekoate-yeimbi babidi nimboeimbo nondihi hohoanimondeihhi aboedi hohoanimo süngundihindi ahei himboahü. Se münguambo si hibadihündühi Kraisindi hohoanimo nafuindahündüri. ⁶Münguambo si se aboedi hoafi yangiri hoafindei. Yahurai hoafi ranimboanei nindou ai himborimbo yifirayei. Rananimbo se nindou-yafe düdufe hoafi ra simbori hoafimbo wudindihi fifirindihi hoafindeimboyei.

Por ai Tikikus Onesimusimbo Korosinambo koamarihepiri

⁷Tikikus ai siheimbo müngua ratüpuri ro ratüpurimayahi ranahambo hoafindündürimbui. Nindou ndanana aboedi anihondümbo Adükarindi ratüpuri ratüpuriyu-randeimb-ani asu ro-dibo sihefi ratüpuriyefi-rihundeimbi wandaf-ani. ⁸Ranimboanahi ro ahambo siheimbo sowana koararihehini, ai sini ro nine ratüpuri ratüpurayefi ranimbo hoafiyo-ndürimbohünda. Raninambo sihei ngusüfo nginindamindi-ndürimboe. ⁹Onesimus amboani ai-dibo koararihehini. Ai sehünd-ani asu sihefi aboedi hamindi wandaf-ani. Ai-animbo siheimbo nine-moatükuni ndanihü tüküfe arandi ranahambo wataporimbo-ndinarümboayafani.

Por ai Korosimbo karihasihandüri ehundüri

¹⁰Aristarkus ro-dibo karabusambe anüngu ai-amboani siheimbo hihifarandüri. Mak, Barnabasindi asandi, ranai-amboani siheimbo hihifarandüri. Ai siheimbo sowana düduwani ana, ahambo se ndahorimindei sapo ro siheimbo hoafimayahandüri ranimbohünda. ¹¹Sisas Sastus sahündo-rihundeimbi ai-amboani siheimbo hihifarandüri. Ai yangiri Sudahünd-anemo ro-babidi God nginindi hifandarandi ranahambo ratüpurimayefi. Aiyomo wambo aboedi hamindi mafarihoundiri. ¹²Epafras sehünda ai Sisas Kraisindi ratüpuriyu-randeimb-ani siheimbo hihifarandüri. Münguambo si aho ra aiani siheimbo nginindi nüngumbo siheimbohünda Godimbo didibafifi arandi. Ai siheimboya, nindou hondü nimboeimbo sihei hohoanimo ranai God hohoanimoayu ra fifirihindühi nginindi mbiniboadeia yahuhayamboani Godimbo didibafifi arandi. ¹³Ro yarihe siheimbo hoafayahandüri, Raodisia-hündi, Hiroporisi-hündi ai siheimbo farihefe-ndürimbohünda afindi ratüpuri tinjirifoyei arihündi. ¹⁴Ruk yihoefi dokta asu Dimas ai-amboani siheimbo hihifarinandüri. ¹⁵Wandi hihifi hoafi nda se wandafi mami Raodisia adükari ngoafihü amarei aheimbo hoafindahündüri. Nimfa asu Kraisindi nendi ahandi worambe fandihi-rihundeimbi ranaheimbo yihoefi-mayo hififi hoafi nda hoafindahündüri.

¹⁶Pas nda se hoeindihi mbundihumbo-animbo asu nindou Raodisia ngoafihü amarei aheimbo sowana koandihhehinda ai-amboani hoeimbirihind-amboane. Asu se-amboani wandi-mayo pas Raodisia-hündambo koamariheheandi ra hoeindihindi.

¹⁷Ŋga asu se Arkipusimbo randihi hoafindahündowohü animboya, 'Sapo ratüpuri Adükarindi-mayo masowandifi ranahambo se hibadambo animbo ndondo ratüpurindafi,' mbisahündo.

¹⁸Ro Por-anahi wandi warinambo siheimbo hihifi hoafi nda sürü paparihandi. Se wambo hohoanimo-ndahündiri, ŋga ro karabusambe-anahi animboahi. Ŋga Godindi moani hipoambofe hohoanimo ra siheimbo sowahi mbeyangoro-wamboane, ŋga karihasihandüri.